

## Gure treguari jarriak

### I

Ogia eroatera  
kalera irtena  
edo paseatzera  
herrian barrena  
kezka bat antzeman dut  
kezka nabarmena  
denon aurpegietan  
antzematen dena:  
hautsi egin duela  
ETAk su etena.

### II

Orain arte mugitu  
diren denak zero  
beren bizitza lasai  
egin egunero,  
orain agertzen dira  
nazkaturik edo...  
prozesuaren alde  
sutsu eta bero  
urtebete linboan  
pasa eta gero.

### III

Tregua garai honetan  
kaleko hizkuntza  
izan da futbolaren  
inguruko funtsa,  
Athletic ta Realta  
segunda ta putza  
estadioak beteta  
zaleen laguntza...  
Indar horrekin ez da  
prozesurik bultza.



### IV

Uste dugu bakea  
eta kalapita  
ez dela besterikan:  
makropolitika.  
Ikusle hutsak izan  
sofan eserita  
utzi politikoei  
beren dinamika  
ta gero kexatzea  
ez da ba polita...

### V

Orain juzkatzen dugu  
egoera grabe  
orain dena da kezka  
eta atsekabe,  
urtebete honetan  
asko egin gabe  
gustatzen ez zaigunaz  
nazkatuta gaude  
baina zer egin dugu  
aldaketen alde?

### VI

Ez gara herritarrak  
emaitzen errudun  
baina bai neurri baten  
horren arduradun  
emaitzak nahi ditugu  
ez lanean jardun,  
ez obligaziorik  
soilik onuradun  
negar egin baino lehen  
lan egin dezagun.

### VII

Orain kalean hitza  
da berriz frakaso  
orain dena da kezka  
dena da arazo,  
sinestu nahirik zenbait  
esperantza lauso  
badirudi, agian,  
nork daki... akaso,  
sekulan eman gabe  
norberak bi pauso.

### VIII

Politika ez dugu  
metereologia  
ez eszeptizismoa,  
ideologia,  
dena ez da etortzen  
goitik eroria  
soilik geratzen zaigu  
patua, zoria  
guk idatzi ezean  
gure historia.

**DOINUA:** Hamalau heriotzarena